

www.BibleForChildren.org

Génesis 3



Te Eva ni xnani Adán ñasi'i de, chi
suu ña kuu si'i ndi'i ñayiu ñuyiu.



Te koo kuu kiti ndichi ndeva'a ka ini
saa nuu ndi'i kiti yuku ja ni sa'a Jito'o
Dios. Ni jikan tno'o ndichi ña ti jin
ñasi'i yun, te jiña'a ti: –¿A ndija ja ni
ka'an Dios ja ma kuu vi kaa ron kiti
vixin kuun nuu ndi'i yutnu kuu ya'a?



Te jiña'a ñasi'i yun
nuu koo: –Kuu vi kaa
rin ndeni javixin kuun
nuu yutnu kuu ya'a. Su
javixin kuun yutnu nukuiin sagua ya'a guaa
kachi Dios: “Ma vi kaa ron javixin tnu ni ma
vi ke'e ron, nagua ja ma vi kuu ron”, kachi
ya –jiña'a ña.



Yun te jiña'a koo
yun nuu ñasi'i: –Ma
vi kuu ron, chi jini
gua'a Dios ja kiuu na
vi kaa ron kiti vixin ya'a, te vi nune nuu ron
ja vi kuni ron ndeja kuu java'a vi ndeja kuu
jakue'e, te vi kuu inuu ron jin maa Dios
–jiña'a ti.



Te ni jini ñasi'i yun ja gua'a kiti vixin
kuun yutnu yun ja vi kaa ña ti, te ni
ndakondia'a ña ja luu ndeva'a ka
ndaa kiti vixin yun, te gua'a ja vi kuu
ndichi ña, te ni ja'nde ña in kiti vixin
yun, te ni jaa ña ti, te
suni ni jiña'a
ña ti ni jaa yii ña.



Yun te vi nuu saa ni ka jini nduu de
jakanoo ja siun ka ndaa vichi de.
Te ni ka kiku de nda'a tnu tichi
iuu, te ni ka chisa'u de
maa de jin ña.





Te ni ndakana ña Jito'o Dios jin
teyii yun, te jiña'a ya: –¿Ndeno oo ron? Te jiña'a de:
–Ni jini so'o san ja kana ni jiondita ni ne'u yutnu kuii
ya'a, chia kaa vichi san, te yun guaa ni yu'u san, te ni
tayu'u nuu san –jiña'a de.





Te jiña'a Dios: –¿Na in ni kaxtno'o nuu ron ja oo vichi ron? ¿A masu ni jaa ron javixin yutnu ni tatnuni rin ja ma kuu kaa ron?



Te jiña'a de: –Ñasi'i ni taa ni ja kokuu nduu jin san
ni taa ti, te ni jaa san –jiña'a de. Yun te jiña'a
Jito'o Dios nuu ñasi'i yun: –¿Nagua kuu ja
ni sa'a ron? Te jiña'a ña: –Koo ni xnda'u
ña, guaa ni jaa san ti.





Te ni kene'e ña Jito'o nuu ka oo yutnu
kuii Edén yun, te ni nusia'a ña ya nuu
oo ñu'u ja ni sa'a ña ya ja na
kokutu de.




Te nuu ni kene'e ña ya jin de, te ni jani
ya ia ka jinokuechi nuu ya ichi nuu
kana nikandii jin in yuchi kani kai vi
koko kuakua'a jionduu ndi'i ichi
kua'an nuu oo yutnu taa jateku
yun, ja vi kokoto
ya ja tu na
in ki'in.




Yun te ni ka nitna'a Adán jin ñasi'i de Eva, te ni jinku'un lulu ña, te ni skaku ña in seyii ña te jiña'a ña: –Saa kuini maa Jito'o guaa ni taa ya in seyio. Te ni xnani ña jin Caín. Te nuu kuee ka, te ni kaku Abel ñani Caín. Te Abel, chi ndikachi ni ota'ui, te Caín chi ni ojitui nuu ñunde'i.



Yun te ni oo in kiuu nee Caín nagua kee nuu ñunde'i
jitui ja ni sokoi nuu Jito'o. Te suni Abel, chi nei se'e
xtnañu'u ndikachi kiti ndatnu ka ja ni sokoi
nuu Jito'o, te junkuaan ini ya Abel jin ja
ni sokoi. Su tu ni junkuaan ini ya Caín
jin ja ni sokoi. Yun guaa ni kiti ndeva'a
ini Caín, te vi ni ndukua'a ñu'i.



Te ni oo in kiuu jiña'a Caín nuu ñani Abel: –Ki'inkueio yuku. Te nuu ni jinokuei yuku yun, te ni ndakoo Caín siki ñani, te ni ja'ni ñai.



Yun te ni jikan tno'o ña Jito'o jin Caín, te jiña'a ya:
–¿Ndenu oo ñani ron Abel? Te jiña'i: –Tu jini san.
¿Xaan suchi yun jito san? Yun te ni kee Caín nuu ia
Dios, te kua'in ja ni jinkoi ñuu nani
Nod ja oo jika jin Edén ichi
nuu kana nikandii.



Yun saa ni ka nitna'a tuku Adán jin ñasi'i de, te ni junku'un lulu ña, te ni skaku ña in seyii, te ni xnani ña jin Set, chi ni ka'an ña: –la Dios ni ndataa inka seyio nuu tniuu Abel suchi ni ja'ni Caín.



Te nuu kuee ka ja ni jinkoo Set, te ni ka jinkoo ka seyii vi sesi'i de, te una ciento ka kuia ni oteku de ñuyiu. Te ndi'i kuia ja ni oteku Adán kuu iin ciento oko uxi kuia, te ni ji'i de.




Te ni ndia'a Jito'o ja ni kaya ndeva'a jakue'e ka sa'a ñayiu ñuyiu, chi nino'o ni jakue'e ka ondakani ini jin anui, te nino'o ni jakue'e yun ka osa'i.



Te jiña'a ya: "Xnaa ndi'i rin ja oo ñuyiu ja ni sa'a rin ndee ñayiu vi kiti kuun nda'a vi kiti ñuu maa vi kiti ndagua andivi, chi ndatna'u ini rin ja ni sa'a rin".



Su Noé, chi tee chiñu'u ia Dios kuu de, guaa ni
ndunda'u ini ña Dios jin de. Te ni oo uni
seyii Noé, te sui ka kuu Sem
vi Cam vi Jafet.



'Chi ni kutoo ndeva'a ña ia Dios jin
ñayiu ñuyiu, yun guaa ni jiña'a ya
invaa Se'e ya, nagua ja ndi'i ñayiu
ka kandija ña jin ya ma vi junai,
chi vi ni'i ja vi kotekui nikuii nikani.



Romanos 3:23 Chi ndi'o ni ka sa'a yika kuechi, te ni ka kuu jikao nuu ye'e tajan ia Dios.

Romanos 6:23 Chi ya'u ja ka ni'o ja ka sa'o yika kuechi kuu ja vi kuo, su ja skuta'u ña ia Dios kuu ja vi kotekuo nikuii nikani jin Jito'o Jesukristu.

Hebreos 9:27 Saa nagua ka ji'i ndi'i ñayiu invaa ni jichi, yun te kua'ankuei ja ka'nde ia Dios kuechi.

Efesios 2:8,9 Chi ni ka'an nda'u ni ka'an kee ña ia Dios jion, ja ni skaku ni'nu ña ya jin ma'ñu sagua ja ka kandijao. Te masu in ja vaji nuu mao kuu, chi in java'a ja ni skuta'u ña ia Dios kuu. Te masu jin tniuu gua'a ja ka sa'o kuu ja skaku ni'nu ña, nagua ja ni in ñayiu ma vi kokuu teyii jin tniuu gua'a ka sa'i.



Romanos 10:9,10 Chi nuu ja jin yu'u ni na'ma ni ja Jesús kuu Jito'o ni, te kandija ni jin anu ni ja ia Dios ni ndaxteku ya ne'u ndiyi, te kaku ni'nu ni. Chi jin anuo kandijao nagua ja kokuo ñayiu ndaa, te jin yu'o na'mao ja Jesús kuu Jito'o, nagua ja skaku ni'nu ña ya.

San Juan 3:16,17 'Chi ni kutoo ndeva'a ña ia Dios jin ñayiu ñuyiu, yun guaa ni jiña'a ya invaa Se'e ya, nagua ja ndi'i ñayiu ka kandija ña jin ya ma vi junai, chi vi ni'i ja vi kotekui nikuii nikani. Chi tu ni tetniuu ia Dios Se'e ya ñuyiu ja xtavi kuechi ya ñayiu ñuyiu, chi ni tetniuu ña ya nagua ja vi kaku ni'nu ñayiu ñuyiu jin ma'ñu sagua ya.



1 Juan 5:11-13 Te ya'a kuu tno'o ndaa ja ndakani maa ia Dios: ja taa ya ja vi kotekuo nikuii nikani, te jin ma'ñu sagua Se'e ya vi ni'o ja vi kotekuo. Chi ñayiu oo jin Se'e ia Dios, te kotekui nikuii nikani, su ñayiu ja tu oo jin Se'e ya, te ma kotekui. Tno'o ya'a ni tee san nuu in in ni ja ka kandija ni sivi Se'e ia Dios, nagua ja vi kuni ni ja vi koteku ni nikuii nikani.



Génesis 3 – 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot; Tammy S.

Mixtec, Northern Tlaxiaco Bible (xtn) © 2016, Wycliffe Bible
Translators, Inc. All rights reserved.

<https://live.bible.is/bible/XTNTBL/GEN/1>

©2025 Bible for Children, Inc.

www.M1914.org www.bibleforchildren.org

